

दिनांक 07.11.2025

समय: 18.45 बजे

- राष्ट्रीय गीत वंदे मातरम् री डोढ़ सौ वीं वर्षगांठ रे मौके प्रधानमंत्री नरेन्द्र मोदी स्मरणोत्सव रो उद्घाटन कीनो-वंदे मातरम् ने ऊर्जा अर संकल्प बतायो।
- राज्य मांय ई वंदे मातरम् री वर्षगांठ रे मौके न्यारा-न्यारा कार्यक्रम राख्यी ज्या-मुख्यमंत्री भजनलाल शर्मा कह्यो-वंदे मातरम् म्हाणी भेळी चेतना री निशाणी।
- राज्य सरकार घणी बिरखा रा असर वाळा 6 ज़िलां रा 3 हज़ार गांवां रे अभावग्रस्त व्हेवण रो ऐलाण कीनो।
- अंता उपचुनाव सारु शांति सागे मतदान री सगळी ज़रूरी तैयारियां पूरी व्ही।
- प्रदेश मांय सड़क सुरक्षा अभियान रा तैत हाल ताई साढ़े 4 हज़ार ऊं बत्ता चालान करी ज्या।

000

राष्ट्रीय गीत "वंदे मातरम्" रा डोढ़ सौ बरस पूरा व्हेवण रे मौके एक साल ताई चालण वाळा स्मरण उत्सव रो प्रधानमंत्री नरेन्द्र मोदी आज नई दिल्ली मांय उद्घाटन कीनो। नई दिल्ली रा इंदिरा गांधी इंडोर स्टेडियम मांय राख्यी ज्या जळसा मांय प्रधानमंत्री कह्यो के वंदे मातरम् एक मंत्र, ऊर्जा, सपनो अर संकल्प है।

.....

ई मौके श्री मोदी यादगार डाक टिकट अर सिक्को ई जारी कीनो। वे अंदकमउजंतउ150ण्पद पोर्टल ई सुरु कीनो। इण मांय लोग राष्ट्रीय गीत गाता थकां वीडियो अपलोड कर र सर्टिफिकेट हासिल कर सके है। ई मौके प्रदेश मांय ई केई कार्यक्रम राख्यी ज्या। राज्य स्तर रो जळसो जयपुर मांय राख्यी ज्यो। मुख्यमंत्री भजनलाल शर्मा फूंकणा उड़ा र इण री सुरुआत कीनी। ई दौरान वे कह्यो के "वंदे मातरम् म्हाणी भेळी चेतना री निशाणी है।"

.....

कोटा मांय राख्यी ज्या कार्यक्रम मांय लोकसभा अध्यक्ष ओम बिरला कह्यो के वंदे मातरम् भारत री आत्मा अर एका रो दरसाव करे है। श्री बिरला इण ने संकल्प रो दिन बताता थकां खुद रे पाण ऊबो भारत बणावण रो संकल्प दोहरायो। जळसा मांय मौजूद सगळा लोग मिल र वन्दे मातरम् गीत गायो। भीलवाड़ा मांय जागरूकता रैली निकाळी ज्यी, जदके किशनगढ़ कने बांदर सिंदरी रा केंद्रीय विश्वविद्यालय मांय खास कार्यक्रम राख्यी ज्यो। जैसलमेर मांय प्रभातफेरी निकाळी ज्यी। न्यारा-न्यारा सरकारी दफतरां मांय वन्दे मातरम् गीत गायी ज्यो। आकाशवाणी रा जयपुर केन्द्र मांय ई अहलकार अर कर्मचारी वन्दे मातरम् गीत गायो।

000

प्रधानमंत्री नरेन्द्र मोदी आज राष्ट्रीय गीत "वंदे मातरम्" री डोढ़ सौ वीं वर्षगांठ रे मौके केन्द्रीय गृह मंत्री अमित शाह रो लेख साझा कीनो। सोशल मीडिया पोस्ट मांय श्री मोदी मांड्यो के ई लेख मांय सांस्कृतिक गौरव अर सभ्यतागत राष्ट्रवाद रा मिश्रण, वंदे मातरम् गीत रे जाग जगावण रो प्रभात गीत बण जावण रो जिकर करी ज्यो। प्रधानमंत्री कह्यो के लेख मांय ओ ई बतायी ज्यो है के वंदे मातरम् गीत साल 2047 ताई भारत ने भरोसेमंद, खुद रे पाण ऊबो अर ओजू अव्वल विकसित देश बणावण रो सपनो सांचो करण री सीख देतो रहवेला।

000

मुख्यमंत्री भजनलाल शर्मा आज उदयपुर मांय भगवान बिरसा मुंडा री डोढ़ सौ वीं जयंती रा सिलसिला मांय जनजातीय गौरव पखवाड़ा रा तैत राख्या जा रह्या क्रियाकलापों रो जायजो लीनो। पखवाड़ा रा तैत, 15 नवम्बर ने डूंगरपुर मांय राज्य स्तर रो जळसो राख्यो जावेला, जिण मांय मुख्यमंत्री ई शामिल व्हेला। डूंगरपुर रा लक्ष्मण मैदान मांय आज स्कूली बच्चा मानव श्रृंखला बणा र बिरसा मुंडा ने याद कीना। पाली रा पीएम श्री जवाहर नवोदय विद्यालय मांय भगवान बिरसा मुंडा री ज़िन्दगी माथे आधारित सांस्कृतिक कार्यक्रम अर सवाल-जवाब री होड़ां राख्यी ज्यी।

000

सरकार राज्य मांय घणी बिरखा रे कारण उनाळू साखां रा खराबा वाळा छह ज़िलां रा किसानां सारु कृषि अनुदान वितरण री मंजूरी दे दीनी है। अजमेर, अलवर, झुंझुनूं, कोटा, पाली अर बांसवाड़ा ज़िलां री 40 तहसीलां रा 2 हज़ार 961 गांवां रे अभावग्रस्त व्हेवण रो ऐलाण करी ज्यो है। मुख्यमंत्री भजनलाल

शर्मा कानी ऊं दीरीजी ई मंजूरी ऊं आं जिलां रा आठ लाख ऊं बत्ता काश्तकारां ने एसडीआरएफ रा तैत माली मदद मिलेला।

000

लावारिस कुत्तां कानी ऊं बटको भर लेवण रा खतरा ने ध्यान राखता थकां सुप्रीम कोर्ट आवण—जावण री ठोड़ां ने सुरक्षित राखण अर हाईवे ऊं लावारिस ढांढा—ढोरां अर दूजा जिनावरां ने हटावण ऊं जुड़्या दिशा—निर्देश दीना। न्यायमूर्ति विक्रम नाथ, न्यायमूर्ति संदीप मेहता अर न्यायमूर्ति एन.वी अंजारिया री पीठ खुद संज्ञान लेता थकां देश मांय लावारिस कुत्तां रा प्रबंधन ऊं जुड़्या मामला री सुणवाई कीनी। अदालत ई बाबत् स्कूल—कॉलेजां, अस्पतालां, खेल—कूद री ठोड़ां, बस स्टैंड अर रेलवे स्टेशनां ऊं लावारिस कुत्तां ने दूर राखण सारु जरूरी बाड़ लगावण रा हुकम दीना। अदालत सगळा राज्यां अर केंद्र रा राज वाळा प्रदेशां रा मुख्य सचिवां ने इण री पालना करावण रा हुकम दीना।

000

अंता विधानसभा उपचुनाव—2025 सारु स्वतंत्र, निष्पक्ष अर शांति सागे मतदान करावण सारु जरूरी सगळी तैयारियां पूरी व्हेगी है। वठे 11 नवम्बर ने वोट पड़ेला। मुख्य निर्वाचन अधिकारी नवीन महाजन बतायो के हिफाजत अर निगराणी सारु 43 सेक्टर मजिस्ट्रेट, 12 क्विक रेस्पॉन्स टीमों अर 4 आला प्रशासनिक अहलकारां समेत दूजा अहलकार अर पुलिस वाळा तैनात करी ज्या है। वे बतायो के अंता हलका रा 268 मतदान केन्द्रां माथे 2 लाख 28 हजार ऊं बत्ता मतदाता वोट दे सकेला। बिना डर्यां वोट देवणो तैय करण सारु 4 हजार 262 लाइसेंसशुदा हथियार जमा करायी ज्या है अर हाल ताई 21 करोड़ रुपया ऊं बत्ती रकम ज़ब्त करी ज्यी है। सगळा मतदान केन्द्रां माथे वेबकास्टिंग अर दिव्यांगजन सारु खास व्यवस्थावां करी ज्यी है।

000

प्रदेश मांय सड़क हादसां माथे काबू करण सारु चलाया जा रह्या सड़क सुरक्षा अभियान रा तैत राज्य मांय हाल ताई साढ़े 4 हजार ऊं बत्ता चालान करी ज्या है। सलूबर मांय आवण—जावण रा कायदां ने नीं मानण वाळां रे खिलाफ 4 नवम्बर ऊं काल ताई पुलिस, प्रशासन अर परिवहन विभाग मिल र 41 गाड़ियां रा चालान कीना। जिला परिवहन अधिकारी विपिन माहेश्वरी बतायो के स्कूल—कॉलेजां मांय ई यातायात नियमां री पालना करण री हिदायत दीरीजी है। भीलवाड़ा मांय एस.पी. धर्मेन्द्र सिंह यादव हाइवे माथे खास सावचेती राखण रा हुकम दीना है। वे बतायो के गलत तरीकां ऊं आवण—जावण माथे चालान करण सागे ई अंतरराज्यीय ट्रांसपोर्ट एसोसिएशन रे मार्फत जाग जगावण रा शिविर ई लगाया जा रह्या है।

000

झुंझुनूं मांय जिला विधिक सेवा प्राधिकरण री ओर ऊं आज भगवान दास खेतान अस्पताल मांय खून दान शिविर लगायी ज्यो। प्राधिकरण री अध्यक्ष अर सेशन जज दीपा गुर्जर इण रो उद्घाटन कीनो। ई मौके वे खून दान ने सब ऊं मोटो मानव धर्म बतायो। प्राधिकरण री अध्यक्ष बत्ता ऊं बत्ता लोगां ऊं खून दान करण अर प्राधिकरण कानी ऊं दी जा रही मुफ्त कानूनी सेवावां रो फायदो लेवण बाबत कह्यो।

.....

शिविर मांय खून दान करण वाळा न्यायिक अहलकारां अर वकीलां ने पौधा भेंट करी ज्या।

000

भारतीय किसान संघ रा अध्यक्ष के साई रेड्डी रासायनिक खाद काम लेवण रा गलत नतीजां ने ध्यान राखता थकां कुदरती खेती करण माथे जोर दीनो है। वे आज जोधपुर मांय कृषि विश्वविद्यालय रो दौरा कीनो। श्री रेड्डी कह्यो के प्राकृतिक खेती ऊं किसानां रो खर्चो कम व्हेला, स्वास्थ्य सुधरेला अर आमदनी रा जरिया बधेला। विश्वविद्यालय रा कुलगुरु प्रो. जैतावत वां ने विश्वविद्यालय कानी ऊं जैविक अर प्राकृतिक खेती सारु करी जा रही कोशिशें अर नुवा अनुसंधानां री जाणकारी दीनी।

000

श्रीगंगानगर जिला रा 50 किसानां ने आत्मा योजना रा तैत मध्यप्रदेश रा इंदौर भेजी ज्या है। कृषि विभाग रा निदेशक डॉ. सतीश कुमार शर्मा आं किसानां ने हरी झंडी बता र रवाना कीना। अ काश्तकार इंदौर मांय 'फार्म टैक इंडिया एग्जीबिशन' मांय ई भाग लेवेला। ई दौरान, किसानां ने इंदौर अर भोपाल रा कृषि संस्थानां मांय जैविक खेती, फसल कटाई पाछे नवाचार अर खेती—बाड़ी री नुवी तकनीकां री विगतवार जाणकारी दी जावेला।

000